

خَطِ پوُلُس بَلَدِه فِلِيمون

پيشگفتار

فليمون يگ ايماندار بُوَد و اِمکان دَره که يکی از اعضای جماعتِ ايماندارای شارِ کولُسيه بُوَده بَشه. اُو يگ غُلام دَ نامِ اونيسِيموس دَشت که از پيش شی دُوتا کُدد و يگو چيز شی ره ام شايد قد خُو بُرُدد. مُطابقِ قانُون رُوم جَزای اَزُو کلو سخت بُوَد. دَ امزُو زمانِ پوُلُس دَ بَندي خانه بُوَد و اونيسِيموس قد اَزُو آشنا شُد و دَ وسيله اَزُو دَ عيسیٰ مَسِيح ايمان اُورد.

دَ امزی خطِ، پوُلُس از فِلِيمون خاهش مونه که اُو اونيسِيموس ره دَ عِنوانِ برارِ عزيزِ خُو قَبُول کنه و قد ازی کارِ دِل-و-جانِ پوُلُس ره تازه کنه.

فهرستِ عِنوانِ ها

دُعا و سلام (آيه ۱)

شُکرگزاری و دُعا (آيه ۴)

دُعا و سلام

۱ از طرفِ پولس، که بخاطرِ مسيح عيسى بَندیِ اَسْتُم و از طرفِ برارِ مو تيموتائوس بلده دوستِ عزيز و همکارِ مو فليمون ۲ و بلده خوارِ مو اَپفیه و بلده همسَنگرِ مو اَرخِيس و بلده جماعتِ ايماندارای که دَ خانه تُو جَم موشه: ۳ فَيض و سلامتی از جانبِ آتِه مو خُدا و مولا عيسى مسيح نصيب شُمو شنه.

شکرگزاری و دُعا

۴ وختیکه تُو ره دَ دُعا های خُو یاد مُونم، همیشه خُدايِ خُو ره شکر-و-سپاس مَوگيم، ۵ چراکه دَ باره ايمان تُو دَ مولا عيسى و مَحَبَت تُو بلده تمامِ مُقَدَّسین مِيشنوم. ۶ دُعا مُونم که شَرِيکِ کدونِ ايمان تُو قدِ ديگرو تاثیرگزار شنه، تا تمامِ خُوبی های ره پي بُری که دَ وسيله مسيح دَز مو وجودِ دره. ۷ آی برار، مَحَبَت تُو خوشی و دِلگرمی کلو نصيب مه کده، چراکه دِل های مُقَدَّسین دَ وسيله ازتو تازه شُده.

خاهشِ پولس از فليمون

پس، اگرچه دَ وسيله مسيح جُرأت كده ميتنم كه دَ بِلَه تُو
حُكم كُنم تا وظيفه خُو ره انجام بدي، ليكن دَ اساسِ مُحَبَّت
از تُو خاهشِ مُونم. ما، پولس كه يگ آدم پير و فعلاً بخاطرِ
مسيح عيسي بِندي آسْتَم، دَ باره باچه خُو اونيسيِموس كه دَ
دورونِ بِندي گري ما آتِه روحاني ازو شُدَم، از تُو يگ خاهشِ
مُونم. ^{۱۱} او سابق بَلدِه تُو بے فايده بُود، ولے فعلاً ام بَلدِه ازتُو
و ام بَلدِه ازمه فايده مند آسته. ^{۱۲} او ره كه دل-و-جان مه آسته،
دَ پيشِ ازتُو پس ربي مُونم. ^{۱۳} ما ميخاستم كه او ره دَ پيشِ خُو
نِگاه كُنم تا دَ دوروني كه ما بخاطرِ خوشخبري بِندي آسْتَم، دَ
جاي ازتُو بَلدِه مه خدمت كُنه، ^{۱۴} ليكن نَخاستم كه بِدُونِ
موافقتِ ازتُو كُدم كاري كُنم تا نيكي-و-مهرباني تُو از رُوي
مجبُوري نَبشه، بلكه از رُوي رضايِت بَشه. ^{۱۵} شايد دَ امزي
دليل او بَلدِه يگ وختِ كم از تُو جدا شُد تاكه تُو او ره بَلدِه
هميشه قد خُو دَشته بشي، ^{۱۶} مگم نه مثلِ يگ غُلام، بلكه
باله تر از يگ غُلام، مثلِ برارِ عزيز. خصوصاً بَلدِه ازمه او
عزيز آسته، ولے بَلدِه ازتُو كلوتر، ام از نِگاهِ انساني و ام دَ
خدمتِ مولا. ^{۱۷} پس اگه مَره همكار خُو ميدني، امو رقم كه از

مه پذیرایی مونی ازو ام پذیرایی کو. ^{۱۸} اگه کدم غلطی قد تو
 کده بشه و یا کدم چیز از تو قرضدار بشه، د پای ازمه حساب
 کو. ^{۱۹} ما، پولس، قد دست خود خو امی ره نوشته مونم: ”ما
 اوره ادا مونم.“ ^{۲۰} آره، ای برار، امیدوار استم که امی فایده
 تو د نام مولا دز مه برسه. پس دل-و-جان مره د نام مسیح تازه
 کو. ^{۲۱} ما بخاطر اعتمادی که د اطاعت تو درم، ای ره نوشته
 مونم و میدنم که حتی کلوتر از چیزی که تقاضا مونم، انجام
 میدی. ^{۲۲} علاوه ازی، یگ افاق بلده مه آماده کو، چون امیدوار
 استم که د وسیله دعا های شمو دوباره د پیش شمو آورده
 شنم. ^{۲۳} ایپفراس که بخاطر عیسی مسیح قد ازمه قتی بندی
 آسته سلام ربی مونه، ^{۲۴} امچنان همکارای مه مرقس،
 آرسترخس، دیماس و لوقا. ^{۲۵} فیض مولا عیسی مسیح قد
 روح شمو بشه.